

CONVENIO DE COLABORACIÓN ENTRE A CONSELLERÍA DE CULTURA, EDUCACIÓN E UNIVERSIDADE DA XUNTA DE GALICIA E O CONCELLO DE CALDAS DE REIS PARA AMPLIACIÓN DO IES AQUIS CELENIS.

En Santiago de Compostela, 12 de abril de 2022

REUNIDOS

Dunha parte, Román Rodríguez González, conselleiro de Cultura, Educación e Universidade, nomeado para tal cargo polo Decreto 112/2020, de 6 de setembro (DOG núm. 181, do 7 de setembro de 2020).

Doutra, _____, na súa condición de alcalde do Concello de Caldas de Reis, no exercicio das competencias que lle atribúe o artigo 21.1.b) da Lei 7/1985, de 2 de abril, reguladora das bases de réxime local.

Ambas as partes recoñécense mutuamente capacidade legal suficiente para subscribir o presente convenio de colaboración, e a tal efecto

EXPOÑEN

Primeiro.- Que as administracións das comunidades autónomas poden celebrar convenios de colaboración coas corporacións locais ou con outros entes de dereito público e con persoas físicas ou xurídicas suxeitas ao dereito privado, ao abeiro do disposto no artigo 48 da Lei 40/2015, do 1 de outubro, de réxime xurídico do sector público (LRXSP).

Segundo.- Que segundo o artigo 193 da Lei 5/1997, do 22 de xullo, de administración local de Galicia, as entidades locais galegas e a Xunta de Galicia adecuarán a súa actuación aos principios de colaboración, cooperación e auxilio que puidesen precisar coxunturalmente para o eficaz cumprimento das súas tarefas.

A colaboración entenderase como o deber de todas as administracións públicas de ponderar e respectar, nas súas respectivas actuacións, a totalidade dos intereses públicos implicados, así como, no traballo en común para a solución daqueles problemas que puidesen exporse máis alá do concreto reparto competencial.

Terceiro.- Que o artigo 25.2 da Lei 7/1985, do 2 de abril, reguladora das bases do réxime local, modificada pola Lei 27/2013, do 27 de decembro, de racionalización e sustentabilidade da Administración local, establece que o municipio exercerá, en todo caso, como competencias propias, nos termos da lexislación do Estado e da Comunidade Autónoma, entre outras, a de *"participar na vixilancia do cumprimento da escolaridade obrigatoria e cooperar coas Administracións educativas correspondentes na obtención dos soares necesarios para a construción de novos centros docentes. A conservación, mantemento e vixilancia dos edificios de titularidade local destinados a centros públicos de educación infantil, de educación primaria ou de educación especial"*.

As disposicións adicionais primeira e cuarta da Lei 5/2014, do 27 de maio, de medidas urxentes derivadas da entrada en vigor da Lei de racionalización e sustentabilidade da Administración local, dispoñen que as competencias atribuídas ás entidades locais pola lexislación autonómica anterior á entrada en vigor da Lei de racionalización e sustentabilidade da Administración local, continuarán exercéndoas elas, rexéndose pola indicada lexislación ou, no seu caso, polo dereito estatal aplicable como supletorio, sen prexuízo do disposto nas disposicións adicionais cuarta e quinta da Lei de racionalización e sustentabilidade da Administración local. As competencias que debe asumir a Administración da Comunidade Autónoma de Galicia en materia de educación, saúde e servizos sociais en cumprimento das disposicións da Lei de racionalización e sustentabilidade da Administración local continuarán prestándose polos municipios en tanto non se dean as condicións previstas para o seu traspaso na normativa básica e, en particular, o establecemento do novo sistema de financiamento autonómico e das facendas locais previsto na mesma.

Así mesmo, a disposición adicional décimo quinta, apartado 4, da Lei Orgánica 2/2006, do 3 de maio, de educación, determina que os municipios cooperarán coas Administracións educativas correspondentes na obtención dos solares necesarios para a adaptación ou construción dos centros docentes.

Cuarto.- Que a Consellería de Cultura, Educación e Universidade, de acordo co artigo 31 do Estatuto de autonomía de Galicia, ten as atribucións en materia de planificación, regulación e administración do ensino regrado en toda a súa extensión, niveis e graos, modalidades e especialidades.

Quinto.- Que co fin de materializar a cooperación para potenciar o desenvolvemento do sistema educativo galego, en especial no que atinxe á comunidade escolar da entidade local, a Xunta de Galicia, a través da Consellería de Cultura, Educación e Universidade, e o Concello de Caldas de Reis, acordan subscribir o presente convenio de colaboración para a ampliación do IES Aquis Celenis.

Sexto.- Que conscientes da antedita necesidade as partes intervenientes acordan unir os seus esforzos para acadar o obxectivo sinalado. Por iso, e a fin de levar adiante o proxecto no Concello de Caldas de Reis é necesaria a concorrencia de medios e achegas de ambas as dúas partes interesadas, polo que é preciso determinar o contido da mencionada colaboración, co fin de acadar un encaixe da actuación dentro do marco normativo en vigor.

Así, e co fin de acadar o obxectivo exposto, ambas as partes, de común acordo, conforme ao artigo 57 da Lei 7/1985, do 2 de abril, de reguladora das bases do réxime local, declaran a súa vontade de subscribir o presente convenio, de acordo coas seguintes

CLÁUSULAS

Primeira.- *Obxecto do convenio*

Constitúe o obxecto do presente convenio o establecemento dos mecanismos de colaboración necesarios entre a Xunta de Galicia, a través da Consellería de Cultura,

Educación e Universidade, e o Concello de Caldas de Reis para a ampliación do IES Aquis Celenis, de acordo co establecido na cláusula segunda do presente convenio.

Segunda.- *Compromisos e achegas*

O Concello de Caldas de Reis comprométese a:

- Outorgar as licenzas de edificación necesarias para ampliación do IES, sempre que as obras proxectadas cumpran as determinacións da lexislación e do planeamento urbanístico de aplicación. Para este fin, achegarase proxecto básico e de execución, nos que se encontrarán claramente xustificadas as condicións urbanísticas e toda a normativa técnica de aplicación ao tipo de edificación que se pretende construír.

Na medida en que se trata dunhas obras de interese público, o Concello de Caldas de Reis bonificará o 95% da contía do imposto municipal sobre construcións, instalacións e obras.

- Colaborar coa Consellería de Cultura, Educación e Universidade na disposición dos espazos para reubicar ao alumnado durante a execución das obras, no caso que sexa necesario.
- Obter os terreos lindeiros coa parcela do IES Aquis Celenis polo linde leste, na superficie suficiente para dotación de aparcadoiro disuasorio para os usuarios do IES.

Será responsabilidade do Concello de Caldas de Reis garantir una vez rematadas as obras pola Consellería, que o terreo onde se pretende a dotación de aparcadoiro estea dotado, ao pé da parcela, das infraestruturas adecuadas (subministración eléctrica e rede de sumidoiro).

- Reurbanizar os accesos ao IES Aquis Celenis o ao CPI Plurilíngüe Alfonso VII, de forma que o actual vial que transcorre entre o centro Plurilíngüe Alfonso VII eo IES Aquis Celenis, sexa peonil , establecendo unha circulación rodada

de dobre sentido polo linde leste con xiro na parcela destinada a aparcadoiro, e peonil polo linde oeste onde se sitúa a carballeira.

- En todo caso, antes da finalización das obras do centro educativo, o concello completará a urbanización e aparcadoiro con acceso rodado, pavimentado e dotado de beirarrúas, para garantir a seguridade do alumnado.

A Consellería de Cultura, Educación e Universidade comprométese a:

- Licitar, supervisar e aprobar o proxecto básico e de execución para a obra de ampliación do IES Aquis Celenis.
- Licitar, con cargo aos seus orzamentos, os expedientes de contratación para a execución da obra, así como os expedientes de servizos para a contratación da dirección de obra e dirección de execución e seguridade e saúde, supeditándose o inicio da execución das obras á concesión da correspondente licenza de obra.

Terceira.- Mecanismos de seguimento

A fin de realizar o seguimento e a avaliación do grao de execución do convenio, así como a interpretación e cumprimento do convenio, ambas as partes conveñen a constitución dunha comisión de seguimento, composta por dos representantes de cada unha das partes signatarias.

A Comisión de Seguimento reunirse sempre que o solicite algunha das partes, así como no caso en que xurda algún tipo de controversia durante a súa execución.

A presidencia desta comisión de seguimento será desempeñada pola persoa nomeada pola Consellería, de entre os membros que a compoñen, ou persoas que as substitúan.

A súa actuación axustarase ao establecido na Lei 16/2010, do 17 decembro, de organización e funcionamento da administración xeral e do sector público autonómico de Galicia.

Cuarta.- *Vixencia e resolución*

O presente convenio entrará en vigor na data da súa sinatura e estará vixente ata o momento en que rematen as actuacións recollidas na cláusula segunda, e en todo caso antes do 30 de setembro do ano 2024.

A vixencia do presente convenio poderá prorrogarse coa conformidade expresa das partes intervenientes no caso de que non se rematasen as obras previstas nel, cos límites establecidos no artigo 49 da Lei 40/2015, do 1 de outubro, de réxime xurídico do sector público.

Ademais da expiración do seu prazo de vixencia, serán causas de extinción do convenio o mutuo acordo das partes asinantes ou a decisión unilateral dunha parte por incumprimento da outra parte ou porque existen causas excepcionais e xustificadas que dificulten ou obstaculicen o cumprimento das estipulacións que constitúen o seu contido, previa denuncia cun prazo de dous meses de antelación, así como a decisión xudicial declaratoria de nulidade.

Quinta.- *Natureza e xurisdición*

Este convenio ten natureza administrativa, sendo o réxime xurídico aplicable ao mesmo o establecido no Capítulo VI, Título Preliminar da Lei 40/2015, do 1 de outubro, de réxime xurídico do sector público.

As partes comprométese a resolver de maneira amigable calquera desacordo que poida xurdir no desenvolvemento deste convenio. De persistir a diverxencia, as partes someteranse á xurisdición contencioso-administrativa en orde á resolución de conflitos sobre a interpretación e cumprimento do convenio.

Sexta.- *Publicidade e rexistro do convenio. Consentimento para a publicidade de datos persoais que figuran no convenio*

Ambas as partes asinantes comprométese a dar a este convenio a debida publicidade.

Estarase ao disposto no artigo 15 da Lei 1/2016, do 18 de xaneiro, de transparencia e bo goberno, sobre as obrigas específicas de información sobre convenios.

A Consellería de Cultura, Educación e Universidade inscribirá o presente convenio de colaboración no Rexistro de Convenios da Xunta de Galicia, en cumprimento do disposto no artigo 2.3 a) do Decreto 126/2006, do 20 de xullo.

Así mesmo, a súa sinatura implica a autorización das persoas asinantes para incluír e facer públicos a través do Portal de Transparencia e Goberno Aberto da Xunta de Galicia os datos de carácter persoal contidos no convenio.

Sétima.- *Protección de datos persoais*

As partes asinantes responsabilizaranse de que calquera tratamento de datos persoais que puideran levarse a cabo en virtude do mesmo se realice con absoluto respecto ás normas de seguridade e de conformidade co establecido no Regulamento 2016/179 (UE) Xeral de Protección de datos (en adiante, RXPD), na Lei Orgánica 3/2018, do 5 de decembro, de protección de datos persoais e garantía dos dereitos dixitais (en adiante, LOPDGDD) e demais normativa concordante.

Os datos persoais das persoas físicas asinantes do Convenio serán tratados polos asinantes unicamente para a adecuada formalización e desenvolvemento do mesmo e en base ao disposto no artigo 6.1 b) do RXPD.

Oitava.- *Notificación electrónica*

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e, os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notifica.gal, (<https://notifica.xunta.gal>). Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación

(persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

E en proba de conformidade, asinan o presente convenio no lugar e data indicados, quedando un exemplar en poder de cada unha das partes asinantes.

POLA XUNTA DE GALICIA

**O conselleiro de Cultura, Educación e
Universidade**

POLO CONCELLO DE CALDAS DE REIS

O alcalde